



ATASSUT

UPA14/17-1

Knud Kristiansen

03.04.2014

Nunat Avannarliit Killiit Siunnersuisooqatigiiffiata Savalimmiuni, Islandimi Kalaallit Nunaannilu Naalackersuisunut kaammattuutigaa nunat pineqartut akornanni pilattaasarnernut tunngasut qitiutillugit peqqinnissaqarfiit akornanni suleqatigiittoqalernissaanut suliniuteqaqqullugit. Nunat pineqartut kaammattorneqarput tamanna pissarsiviusumik iluaqutissartaqartillugu pilattaasarnerit assigiinngitsut eqqarsaatigalugit akunnerminni piginnaasanik iluaqutiginiaqqullugit. Islandimit iviagikkut kræfteqalersimasumik pilattaasartoq ullumikkut Savalimmiuni atorneqalereersimavoq qaammatikkaartumik Savalimmiuliartarnikkut. Nunani pingasuni peqqissutsimut naalackersuisut kaammattorneqarput taamatut periaaseqarneq annertusaqqullugu aamma suliassaqarfinnut allanut atuuttussanngorlugu, isumaqatigiissuteqaqqullugillu nunat tamarmik peqataanissaannik, sullissatut sullinneqartutullu.

(Nunat Avannarliit Killiit Siunnersuisooqatigiiffianni Inatsisartut aallartitaasa siulittaasuat, Lars Emil Johansen)

ATASSUT-miit aallartitat siulittaasuata kaammattuutaa imatut oqaaseqarfigissavarput.

ATASSUT-miit ukiut siuliini Inatsisartunut tamatigut kaammattuutigisarparput, naapiffiusinnaasutullu isigalugu pingaartillugu oqariartuutigisarparput, peqqinnissaqarfik pillugu partiit tamarmik isumaqatigiissusiorsinnaanerat. Isumaqatigiissusiornikkut peqqinnissaqarfik ataatsimut isigalugu ukiunut tulliuttunut pilersaarusiorsinnaanngussagaluarpat siamasinnerusumik, aammalu aningaasat periarfissaritinneqartut sinaakkusiunneqartullu atorluarneqarsinnaallutik.

Ilaatigut maannakkut nunatta iluani peqqinnissaqarfiup aqqissuuteqqinnerani, sumiiffinni nunat immikkoortukkaalernerisigut pitsaaqutit, pitsaanngitsortaalu takusinnaalerpagut, naak suli tamakkiisumik aqqissuusseqqinneq atulinngikkaluartuq.



ATASSUT INATSIARTUNI

Taamaattumik ATASSUT-miit pingaartilluinnarparput, peqqinnissaqarfimmi ukiumut milliard-it angullugit aningaasalersorneqaraluartoq, suli annertuunik unammilligassaqarmat, aammalu suli suliaritinniartutik utaqisut amerlammata. Taamaattumillu periarfissarititaasut aningaasaqassutsikkullu piginnaasap killilersoraluaraatigut, nunat allat suleqatiginissaat, aammalu suliaritinniartut eqqarsaatigalugit periarfissarsiuunnissaat tamatigut pisariaqartutut isigaarput.

Aallartitat siulittaasuata kaammattuuta ATASSUT-miit tamakkiisumik taperserparput. Aammalu Naalackersuisup akissuteqaammini oqaatigisai nuannaarutigaaavut, nunallu pineqartut ilaatigut pitsaasumik suleqatigilluarneqareersut, allatigut aamma periarfissarsiuunneqarnerat isumalluarfigaarput.

Peqqinnissaqarfiup aningaasalersornera eqqarsaatigalugu, aamma pisariaqarpoq atorluanerunissarput, soorlu aqqissuusseqqinnerup kingorna angalanerit amerlasuut kinguneraat, assersuutigalugu ernisussiortut, sumiiffiit arlaqartut ernisussiortuerunnikuupput, tamannalu immaqaa apeqquuserneqarsinnaavoq siunertarisamut naapertuunnersoq, tassami angalanernut assigisaannullu peqqinnissaqarfik aningaasartorpoq, taamaattumik ATASSUT-miit ammaffigaarput, ilaatigut pissutsit tamakku eqqartoqqinnissaannut.

ATASSUT-miit kaammattuut akueralugu, aammalu Naalackersuisup akissuteqaataa iluarisimaarlugu, kaammattuu akueraarput, ataatsimiititaliamullu aappassaaneerseqartinnagu innersuupparput.